

## Ambtener of Baentiesman

Een lochtige ienakter veur 4 pers.

A: Ambtener + baentiesman

G: Grietje de koffiejuffer

D: Dure-meneer

J: Jan-mit-de-Pette

De lekaosie is et buro van een Ambtener van Bouw- en Woningtoezicht op et Gemientehuus, op een woensdagmorgen rond een uur of tiene. Et gaot d'r bi'j slot van zaeke omme dat et verschil uutbiielded wodt in et geval d'r een Dure-meneer wat bouwen wil, een Jan-mit-de-pette of dat de Baentiesman ze allemaole de baos is. Gaondeweg wodt d'r dan ok een groot verschil zichtber in sociaole klassen.

D'r is een oolde klinte mit een aorig lappien grond vri'jkommen op et mooiste plakken van 't dörp deurdat oolde Triensje, die daor jaorenlange woond het, opiens (onder verdochte omstaandighe-den?) wegraekt is. Heur man Klaos is jaoren eerder al wegraekt. In et begin ligt et d'r doemendikke bovenop dat de Dure-meneer (kammeraad van de Burgemeester) an de winnende haand is. Halverwege komt d'r toch een lichte veursprong veur Jan-mit-de-Pette mar nemt de Dure-meneer 'zien maotregels' en an 't aende is et dan toch Jan-mit-de-Pette die d'r mit de 'buit' vandeur giet of zol et de Baentiesman toch nog lokken om himzels te verriecken? Gelokkig bliekt d'r nog een een oold stok bi'j de netaoris te liggen waoruut bliekt dat de familie een oold eerste kooprecht op et onroerend goed het. Mar hoe zit et dan mit de dörpsrattels? Was et wegraeken van oolde Triensje dan eins wel een 'netuurlike dood'?

[ Ambtener zit achter zien buro en is drok an 't papperassen en 't komputeren.]

[ Et doek gaot op.]

[ Jan Pette komt deur de deure. ]

J: Goeie morgen. (meneer Klooster)

A: [ wat schaopachtig ] Morgen (Jan mit de P.), gao zitten. Wat kan 'k veur jow doen?

J: Now, et is ziezo meneer, now oolde Triensje wegraekt is heb ik bi'j heur achterkleinzeune een bod daon op et oolde husien mit die aanderhalf bunder grond. Daor wo'k veur mien vrouw (Hendrikkien) en mi'j eins een mooi ienvooldig ni'j huus op zetten laoten. Wi'j hebben al zo vaeke tegen mekeer zegd dat as dat plakken nog es vri'jkomt dan zollen we daor mar wat graeg oonze laeste jaoren slieten. D'r is mooi ruimte veur een peer peerden, wat schaop en een peer kiepen om 'e deure. Mar doe zee die dat rotjook, o pardon meneer heur, die achterkleinzeune van Triensje da'k eerst mar es op et Gemientehuus vraogen mos a'k daor zomar een ni'j huus zetten laoten moch.

A: Jow doelen op dat oolde stee an de Binnerstebutenlaene, dat van oolde vrouw Diekstra?

J: Krek, ja, dat plakken. Jaoren leden het mien vader al es zegd: "Jonge daenk d'r omme, as dat plakken van Triensje nog es vri'jkomt dan is dat veur jow."

A: Ja mar ho es even, dat gaot zomar niet en ik kan vanzels niet in jow pottemenee kieken mar dat is wel zo ongeveer et mooiste plakken van oons hiele dörp. Daenk ie niet dat dat wat een dure grap wodt veur jow?

J: Now ja, et zal wel een peer centen kosten moeten meneer, mar wi'j bin altied slim zunig west. Niet overdreven mar we hebben wel een roege cent op 'e baank en d'r zit grif ok nog wel wat in de oolde sokke.

A: Ja, mar vergisse je niet. Zokke plakkies bin d'r mar zunig meer en daor is vaaste wel meer belangstelling veur. En d'r bin vandaege-de-dag ok nog al wat riegelties daor aj' an voldoen moeten veurdaj' bouwen meugen zoas, grondverontreinigingsonderzoek, archeologisch onderzoek, milieuwetten, flora- en fauna en de ni'je voegelrichtlijnen, grondwaeteronderzoek, de vestigingswet, lewaaioverlastwet, en gao zo mar deur. Ik weet niet, ik weet niet... [ trekt een slim naodaenkend gezichte ] mar ik zol zeggen, stap es naor een architectenburo en dien dan mar es een mooi plan in. Dan moe'we mar es kieken.

J: Dus meneer daenkt dawwe dat wel klaor kriegen?

A: We doen hier gienertied wat, dat beloven doe'we al hielemaole niks, mar wie wet.

J: Now, dan eerst mar dankjewel veur jow tied meneer heur, en dan gao ik eerst even naor de timmerbaos om een tekening. Dan kom ik mit een weke-of-wat wel es even weer.

A: Dat zo'k mar doen.

J: Now, dag meneer.

A: Dag eh...

[ Ambtener schuddekoep wat en gaot weer 'drok' an 't wark... ]

[ Dure-meneer komt mit een zwierigezwaai binnenstappen. ]

D: Goeiemorgen. Ik komme hier krek van boven bi'j mien kammeraod Carel weg en wi'j moe'n et es even hebben over dat stee van oolde Triensje. Carel zegt dat ie dat wel even veur mi'j regelen kunnen om die oolde klinte plat te smieten en d'r een geweldig kesteel veur mi'j daele te zetten.

A: Ok goeie morgen meneer ... hoe was de naeme, zeden jow?

D: Hoezo, hoe *was* de naeme, hoe *was* de naeme. Ken ie mi'j dan niet. Advekaot Janszen van Janszen, Janszen en Janszen *is* de naeme, en ie zeggen *was* de name, ik zegge Janszen *is* de naeme.

A: O ... ja ..., now goed, eeh... meneer Jansen dan...

D: Janszen mit 'sz', dat begriep ie wel.

A: O ... ja..., now goed, meneer Janszen dan. En jow kwammen krek van boven zeden jow...

D: Ja, dat zee ik ja, ik kom krek bi'j jow *g r o t e b a o s* weg en we hebben ofpraot dawwe vandemiddag tegere naor de golfbaene gaon om een ballegien te slaon dat ik hebbe now niet al te vule tied meer.

A: Jow bedoelen te zeggen dat jow boven bi'j de Burgemeester van de kaemer kommen?...

D: Ja, dat zee ik ja, ik kom krek bi'j jow *g r o t e b a o s* weg en die zee dat ie wel even wat veur mi'j regelen kunnen omtrent dat oolde stee van Triensje an de Binnerstebutenlaene. Dat ik zol zeggen, leg al je aandere wark – wat dat ok veur onzin wezen mag – mar even an kaante en bel mien goeie vrund Joost van Diekman, die van Diekman en Diekman architecten mar gauw even op en maek tegere mit him een strak plan. Ik hebbe boven krek al even mit Joost beld en hi'j hadde nog wel een standerd anvraoge in zesvoold in de kaaste liggen. Aj'm die straks even mit jim beidend deurnemen dan kuwwe morgenvroeg de stokken wel tekenen. Aj'm beslist nog wat van mi'j weten moeten dan hej' hier et kaortien van mien sikteresse. Now moe'k neudig vot, en ik rekene d'r op dat et goed komt. Goeiemorgen.

[ D: gaot of en A: veegt him et zwiet van 'e kop ... ]

[ G: de koffiejuffer komt d'r mit et koffiekarregien in. ]

G: Och, wat kieken jow mal toe, is 't wel goed? [ Begint mit een schotteldoek ok op et heufd van

A: omme te poetsen. ]

A: Och, vertel et mar an gieniene, mar ie weten toch wel dat oolde Triensje laestdaegs wegraect is? En now lopen ze mi'j hiere de deure plat om dat plakkiën. Mar et slimste is dat mien vrouw en ikke daor ok graeg henne wild hadden te wonen. En now lopt die droktemaeker van Janszen d'r krek uut en die het wat bekonkelefoest mit de Burgemeester en now wee 'k eins niet meer hoe 'k et hebben zal. Krieg ik t'aovend van mien Hennie op 'e kop vanzels, da'k zoe'n sloegerd bin en Jan mit de Pette krigt et niet mar now gaot die dikkop van Janszen d'r vaaste mit an 'e hael. Et is mi'j toch wat.

G: Toch mar een paantien koffie doen of hej' liever een slop bakkiën thee?

A: Hej' niet wat starkers?

G: Now nee, mar ik hebbe d'r wel een gevulde koeke bi'j. Weej' wat, schink ik mi'jzels ok even iene in en blief ik dat hier even opdrinken. Kuuwe d'r nog wel even over praoten. Zuuwe dat dan mar doen?

A: Ja dat is goed mar niet te lange heur want ik moet drekt an 't bellen en doen veur die malle kerel.

[ Beidend drinken heur koffie en d'r wodt -mit naodrok- niks zegd.]

[ G: komt in de bieten en wil weer veerder mit heur koffiekarregien.]

G: Now dat locht aorig op is 't niet? Even bi'jpraoten wil nog wel es helpen. Mar now moe'k d'r weer vandeur heur. D'r zitten meer op mi'j te waachten.

[ G: gaot of en verget heur koffiekarre.]

[ G: komt weeromme om heur koffiekarre op te haelen.]

G: Ik binne hielendal veraldereerd, 'k zol mien koffiekarre al haost vergeten. Wat lopt et seins mal toe in de wereld!

[ A: verslat in de papperassen en de komputer. An de tillefoon wodt iederiene ofsnuwd totdat....]

A: Mit bouwbedrief Van Dellen, zeg ie? (...) Ja, dat zol wel kunnen, mar zol 't niet beter wezen awwe even wat kalman doen? (...) Nee, dat is wel zo, mar Jan mit de Pette het gien haost he'k begrepen en ik hebbe ok wel meer te doen, ziej'. (...) Jaowel, 't is wel een gaedelik plakkiën mar ik geleuf niet dat ze d'r veur in de riegel staon om daor wat te bouwen heur. Nee, dat is trouwens veur de meersten ok niet weglegd, dat doe mar kalmpiesan. (...) Is goed, tot kiek es.

[A: veegt him alweer et zwiet veur van 'e kop ... en alweer gaot die verrekte tillefoon ]

A: Dag meneer Diekman. (...) Ja daor he'k wel es van heurd heur. Van Diekman en Diekman architecten bedoel ie toch? (...) Nee, ik zol wel graeg willen mar ik hebbe now wat heufdzeerte dat ik gao vandemiddag mar naor huus geleuf ik. Even een peer ure op bedde en dan kan 'k d'r wel weer tegenan. (...) Nee, morgen bin 'k de hiele dag op een bi'jschoelingskursus en vri'jdag he'k een ATV, dat et wodt 'm disse weke niet meer bin 'k bange. (...!@#\$\$%^&...) Ja, dat begriep ik wel mar jow moe'n et ok es van oonze kaante bekieken. Wi'j kun ok gien iezer mit de hanen bugen! (...!@#\$\$%^&...) Ok dag, meneer Diekman...

[A: En hi'j veegt him alweer et zwiet van 'e kop ...]

A: Now moe'k as de weerlocht mien vrouw mar es even bellen. Es kieken wat de vrouw d'r van daenkt...

Ja, mit mi'j. Moej' es luusteren. Now staon ze hier in de riegel om dat plakkien van oolde Triensje mar daor wol ie toch ok zo graeg henne? (...) Ja, vanzels bin ik de man die d'r uutaenlik over giet mar in disse sitewaosie bin 'k zo bange dat ze d'r aachter kommen en dat kan mi'j hier de kop wel es kosten. (...) Dat begriep ik ok wel vanzels, mar hoe zullen oonze jongen now studeren, as heit in de bak zit? (...) Now ik heur et wel, ik hebbe an jow ok niks. [ Smit wat kribbig de haoke op et toestel. ]

[ En weer gaott die smerige tillefoon. ... ]

A: Ja, dat kun jow now wel zeggen Diekman mar et is niet oonze gewoonte om hier zo hadde te warken. Nee., now, veur twaelf ure is beslist onmeugelik. (...) Ja, ik begriep wel dat jow opdrachtgever haost het mar ik zee jow vandemorgen al eerder: we kun hier ok gien iezer mit hanen en voeten ... (...!@#...) Dat heur ik dan wel. Dag meneer Diekman.

[ En alweer die smerige tillefoon. ... ]

A: Dag, meneer de netaoris. (...) Ja daor he'k van heurd... ja. (...) Ooh, het die jow al beld. Wat zeg ie, was d'r een testament? En wat staot daor dan in? (...) Meuj' dat niet zeggen. Mar we bin toch beide ambteners, za'k mar zeggen. Ie begriepen toch wel dat ze van mi'j niks te weten kommen zullen. (...) Ja, ja..., ja, Jan mit de Pette, die ken ik wel, mar die zal zoks toch in giendertied bestuveren kunnen, zol 't wel? (...) Ooh, het die Dure-meneer jow ok al beld. (...) Ja jong..., is 't echt neudig dat d'r eerst een pelisie an te pas komt. Mar zol hi'j dat dan daoromme daon hebben? Dan moej' toch wel bikkelhadde wezen, aj' zoks andurven!